

Bosna i Hercegovina  
Federacija Bosne i Hercegovine  
Zeničko-dobojski kanton  
OPĆINA VAREŠ  
OPĆINSKO VIJEĆE



**ODLUKA**  
o utvrđivanju standarda i kriterija za  
konačna imenovanja na pozicije u regulirane organe

**adresa:** Zvijezda 34, 71330 Vareš  
**tel:** 00387 32 848 100  
**fax:** 00387 32 848 150

**depozitni broj:** 3380002210017420  
**web:** [www.vares.info](http://www.vares.info)  
**e-mail:** [varesh@bih.net.ba](mailto:varesh@bih.net.ba)



Na osnovu člana 7. Zakona o ministarskim, vladinim i drugim imenovanjima Federacije Bosne i Hercegovine („Sl.novine FBiH“ broj: 12/03, 34/03 i 65/03) i člana 22. Statuta Općine Vareš-Prečišćeni tekst, broj: 01-162/12 od 11.09.2012. godine, Općinsko vijeće Vareš na 40. sjednici, održanoj 29.10. 2020.godine, d o n o s i

**O D L U K U**  
**o utvrđivanju standarda i kriterija za**  
**konačna imenovanja na pozicije u regulirane organe**

**I – OPĆE ODREDBE**

**Član 1.**

(1) Ovom Odlukom se utvrđuju standardi i kriteriji za postupak izbora kojim se vrši konačno imenovanje na pozicije u reguliranim organima definisanim u članu 2. ove Odluke, načela izbora, način oglašavanja, imenovanje komisije za izbor, razmatranje prijave kandidata, obavljanje intervjua, donošenje odluka o konačnom imenovanju, podnošenje prigovora na konačna imenovanja i druga pitanja regulisana odredbama ove odluke.

**Član 2.**

(1) Ova odluka se primjenjuje na konačna imenovanja na pozicije u regulirane organe Općine Vareš u javnim preduzećima i javnim ustanovama i to u Skupštine i Nadzorne odbore javnih preduzeća i Upravne odbore javnih ustanova (u daljem tekstu: regulirani organi) prema kojima Općina Vareš putem Općinskog vijeća, Općinskog načelnika i Skupštine Javnih preduzeća (u daljem tekstu: odgovorni javni službenik) vrši ovlaštenja i obaveze vlasnika državnog kapitala, odnosno u kojima Općina ima pravni interes kao osnivač (u daljem tekstu: osnivač) ili u kojima prema važećim zakonima, pravilima i propisima ima zakonito pravo da vrši nominaciju i konačna imenovanja u regulirane organe.

(2) Izbor i konačno imenovanje članova skupština i nadzornih odbora javnih preduzeća vrši se na način i po postupku utvrđenim Zakonom o ministarskim, vladinim i drugim imenovanjima Federacije Bosne i Hercegovine, ovom Odlukom i Odlukom o usklađivanju statusa javnih preduzeća sa Zakonom o javnim preduzećima u FBiH i Zakonom o privrednim društvima.

(3) Izbor i konačno imenovanje članova upravnih odbora javnih ustanova, vrši se na način i po postupku utvrđenim Zakonom o ministarskim, vladinim i drugim imenovanjima Federacije Bosne i Hercegovine, Zakona o ustanovama, ovom Odlukom, a kod izbora i konačnog imenovanja članova Upravnog odbora Javne ustanove Dom zdravlja Vareš i Zakona o zdravstvenoj zaštiti.

**Član 3.**

(1) Odgovorni javni službenik za konačno imenovanje i razrješenje člana Skupštine Javnih preduzeća i člana Upravnog odbora Doma zdravlja Vareš je Općinsko vijeće Vareš.

(2) Odgovorni javni službenik za konačno imenovanje i razrješenje člana Nadzornih odbora Javnih preduzeća je Skupština javnog preduzeća.

(3) Odgovorni javni službenik za konačno imenovanje i razrješenje člana Upravnih odbora Javnih ustanova osim JU Dom zdravlja je Općinski načelnik.

## II – NAČELA IZBORA

### Član 4.

Konačno imenovanje na pozicije definisane članom 2. ove odluke se ne može izvršiti ukoliko nisu ispoštovana načela utvrđena ovim članom, odnosno sva načela imenovanja provode se na način kojim se osigurava poštivanje i primjena slijedećih principa:

**ZAKONITOST:** Odgovorni javni službenik osigurava da se sva imenovanja vrše na zakonit način i u skladu s ovom Odlukom, važećim zakonima, pravilima i propisima,

**KVALITETA:** sva imenovanja se vrše na osnovu kvalitete, putem dobro informisanog izbora osoba koje po svojim sposobnostima, iskustvu i kvalitetima odgovaraju poziciji u reguliranom organu,

**OTVORENOST I TRANSPARENTNOST:** princip javnosti upravljanja primjenjuje se na proces imenovanja. Funkcionisanje procesa imenovanja mora biti transparentno, osim ako informacija nije povjerljiva, prema odredbama Zakona o zaštiti ličnih podataka Bosne i Hercegovine.

**ZASTUPLJENOST PRI ZAPOŠLJAVANJU:** Odgovorni javni službenik osigurava da se kod konačnih imenovanja na javnu poziciju u reguliranom organu po pravilu odražava sastav konstitutivnih naroda i građana Bosne i Hercegovine i ravnopravna zastupljenost oba spola

### Član 5.

Odgovorni javni službenik ima konačnu odgovornost da osigura da se sva imenovanja izvrše u skladu sa zakonom i odredbama ove odluke, kao i da osigura da se ni jedno konačno imenovanje u regulirane organe ne izvrši ukoliko nisu primijenjene odredbe zakona i ove Odluke.

## III – STANDARDI I KRITERIJI

### Član 6.

- (1) Svi kandidati za imenovanje u regulirane organe dužni su ispunjavati sljedeće opće uvjete:
- a) da su državljani Bosne i Hercegovine,
  - b) da su stariji od 18 godina,
  - c) da nije otpušten iz državne službe kao rezultat disciplinske mjere bilo na kojem nivou BiH, u periodu od tri godine prije objavljivanja upražnjene pozicije,
  - d) da nije pod optužnicom Međunarodnog suda za ratne zločine u bivšoj Jugoslaviji, (član IX.1. Ustava BiH)
  - e) da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima FBiH,
  - f) da nema privatni/finansijski interes u Javnom preduzeću ili Javnoj ustanovi u kojoj se kandiduje,
  - g) da nije član organa zakonodavne, izvršne ili sudske vlasti ili savjetnik u smislu odredbi Zakona o sukobu interesa u tijelima vlasti FBiH, ako se radi o konačnom imenovanju u organe javnih preduzeća,
  - h) da nije osuđivan za krivično djelo,
  - i) da se ne vodi krivični postupak,

(2) Dokaz iz stava (1) tačka h) i tačka i) ovog člana, izabrani kandidat će dostaviti nakon konačnog imenovanja.

(3) Kandidati zaposleni u organima državne službe kao državni službenici koji uđu u užu izbor i budu pozvani na intervju dužni su priložiti akt kojim je kandidatu data pismena saglasnost od strane rukovodioca toga organe državne službe za obavljanje dopunske djelatnosti.

## Član 7.

(1) Pored općih uvjeta utvrđenih članom 6. ove Odluke, kandidati za predsjednika i članove Upravnog odbora Javne ustanove „Centar za socijalni rad“ Vareš, Javne predškolske ustanove „Dječije obdanište“ Vareš, Javne ustanove Opća biblioteka Vareš i Javne ustanove Centar za kulturu i edukaciju Vareš trebaju ispunjavati i posebne uslove:

- a) najmanje srednja stručna sprema,
- b) dvije godine radnog iskustva ako ima srednju stručnu sprema (nakon sticanja SSS), odnosno najmanje jednu godinu ako ima višu ili visoku stručnu sprema, nakon sticanja VŠS, VSS ili Bolonjskog sistema studiranja I, II, III ciklusa (najmanje 180 ECTS bodova),
- c) da nije predsjednik ili član Nadzornog ili Upravnog odbora u pravnom licu sa većinskim državnim kapitalom,
- d) komunikativne i kreativne sposobnosti za savjesno, odgovorno i odlučno vođenje upražnjene pozicije,
- e) sposobnost nepristranog donošenja odluke,
- f) prilagodljivost timskom radu,
- g) sposobnost tumačenja ekonomskih, tehnoloških i pravnih analiza i propisa,
- h) rezultati rada ostvareni tijekom prethodnog radnog angažovanja
- i) preporuke ranijih neposrednih rukovodilaca,

(2) Prilikom primjene posebnih uslova, kriteriji navedeni pod tačkama d) do g) stava 1. ovog člana izrazit će se u bodovima od 1-5.

## Član 8.

Upravne odbore javnih ustanova čine:

1. Upravni odbor Javne ustanove „Centar za socijalni rad“ Vareš ima predsjednika i dva člana i to:

- a) iz reda osnivača – dva člana
- b) iz reda stručnih radnika Ustanove – jedan član

2. Upravni odbor Javne predškolske ustanove „Dječije obdanište“ Vareš ima predsjednika i dva člana i to:

- a) iz reda osnivača – jedan član
- b) iz reda korisnika usluga – jedan član
- c) iz reda stručnih radnika Ustanove – jedan član

3. Upravni odbor Javne ustanove Opća biblioteka Vareš ima predsjednika i dva člana i to:

- a) iz reda osnivača – dva člana
- b) iz reda stručnih radnika Ustanove – jedan član

4. Upravni odbor Javne ustanove Centar za kulturu i edukaciju Vareš ima predsjednika i dva člana i to:

- a) iz reda osnivača – dva člana
- b) iz reda stručnih radnika Ustanove – jedan član

Postupak za izbor članova Upravnog odbora iz člana 8. Ove Odluke provodi komisija iz člana 17. ove Odluke, osim za članove Upravnog odbora pod tačkom 2. ovog člana, gdje postupak provodi komisija koju imenuje Općinski načelnik u skladu sa Zakonom o predškolskom odgoju Zeničko-dobojskog kantona.

Postupak za izbor člana Upravnog odbora Javne predškolske ustanove „Dječije obdanište“ provodi komisija od tri člana koju imenuje Općinski načelnik (jedan član ispred osnivača, jedan ispred vijeća roditelja i jedan iz reda zaposlenih u ustanovi)

Predsjednika i članove Upravnog odbora javnih ustanova iz tačke 1,2,3, i 4 ovog člana imenuje i razrješava Općinski načelnik.

### **Član 9.**

(1) Pored općih uvjeta utvrđenih članom 6. ove Odluke, kandidati za predsjednika i članove Upravnog odbora Javne ustanove Dom zdravlja Vareš trebaju ispunjavati i posebne uslove i to:

- a) da imaju visoku stručnu spremu, odnosno visoko obrazovanje prvog, drugog ili trećeg ciklusa Bolonjskog sistema studiranja sa najmanje 240 ECTS bodova, zdravstvenog ili društvenog smjera.
- b) tri godine radnog iskustva nakon sticanja VSS ili Bolonjskog sistema studiranja I,II,III ciklusa (najmanje 240 ECTS boova)
- c) da nije predsjednik ili član Nadzornog ili Upravnog odbora u pravnom licu sa većinskim državnim kapitalom,
- d) komunikativne i kreativne sposobnosti za savjesno, odgovorno i odlučno vođenje upražnjene pozicije,
- e) sposobnost nepristranog donošenja odluke,
- f) prilagodljivost timskom radu,
- g) sposobnost tumačenja ekonomskih, tehnoloških i pravnih analiza i propisa,
- h) rezultati rada ostvareni tokom prethodnog radnog angažovanja,
- i) preporuke ranijih neposrednih rukovodilaca,

(2) Prilikom primjene posebnih uslova, kriteriji navedeni pod tačkama d) do g) stava 1. ovog člana izrazit će se bodovima od 1- 5

### **Član 10.**

(1) Upravni odbor Javne ustanove Dom zdravlja Vareš ima predsjednika i dva člana i čine ga predstavnici:

- a) osnivača (Općina Vareš) – jedan član,
- b) stručnih radnika zdravstvene Ustanove – jedan član,
- c) Ministarstva zdravstva ZE-DO kantona – jedan član,

(2) Postupak za izbor člana Upravnog odbora – predstavnika Ministarstva zdravstva ZE-DO kantona, provodi nadležni organ Ministarstva zdravstva, koji prijedlog kandidata dostavlja odgovornom javnom službeniku radi konačnog imenovanja.

(3) Postupak za izbor članova Upravnog odbora iz reda Osnivača i stručnih radnika zdravstvene ustanove provodi Komisija iz člana 17. ove Odluke.

(4) Za postupak izbora člana iz reda stručnih radnika zdravstvene ustanove potrebno je dobiti suglasnost Upravnog odbora ustanove.

(5) Predsjednika i članove Upravnog odbora Javne ustanove Dom zdravlja Vareš imenuje i razrješava Općinsko vijeće Vareš, na prijedlog Općinskog načelnika.

## Član 11.

(1) Pored općih uvjeta utvrđenih članom 6. ove Odluke, kandidati za predsjednika i članove skupština javnih preduzeća, kao i za predsjednika i članove nadzornih odbora javnih preduzeća trebaju ispunjavati i posebne uvjete i to:

a) najmanje VSS ili Bolonjski sistem studiranja sa najmanje 180 ECTS bodova za nadzorne odbore javnih preduzeća, odnosno najmanje srednja stručna sprema za članove skupština javnih preduzeća,

b) pet godina radnog iskustva ako imaju srednju stručnu sprema (nakon sticanja SSS), odnosno najmanje tri godine radnog iskustva ako imaju višu ili visoku stručnu sprema (nakon sticanja VŠS ili VSS i Bolonjski sistem studiranja),

c) da nije predsjednik ili član Nadzornog ili Upravnog odbora u pravnom licu sa većinskim državnim kapitalom,

d) da ima certifikat o završenom usavršavanju u skladu sa Uredbom o usavršavanju predsjednika i članova nadzornih odbora i uprava privrednih društava s učešćem državnog kapitala, odnosno ovjerenu izjavu kandidata da prihvata obavezu da usavršavanje obavi u skladu sa Uredbom o usavršavanju predsjednika i članova nadzornih odbora i uprava privrednih društava sa učešćem državnim kapitala, u roku od godinu dana od dana imenovanja,

e) komunikativne i kreativne sposobnosti za svjesno, odgovorno i odlučno vođenje upražnjene pozicije,

f) sposobnost nepristranog donošenja odluke,

g) prilagodljivost timskom radu,

h) sposobnost tumačenja ekonomskih, tehnoloških i pravnih analiza i propisa,

i) rezultati rada ostvareni tokom prethodnog radnog angažovanja,

j) preporuke ranijih neposrednih rukovodilaca,

(2) Prilikom primjene posebnih uslova, kriterij navedeni pod tačkama e) do h) stava 1. ovog člana izrazit će se u bodovima od 1-5.

## Član 12.

(1) Broj članova i način izbora članova u skupštine javnih preduzeća utvrđeni su odlukama o usklađivanju statusa javnih preduzeća sa Zakonom o javnim preduzećima u Federaciji BiH i Zakonom o privrednim društvima.

(2) Predsjednika i članove skupštine javnog preduzeća imenuje Općinsko vijeće Vareš na prijedlog Općinskog načelnika.

(3) Članove nadzornog odbora javnog preduzeća bira skupština javnog preduzeća, a predsjednik se bira na prvoj konstituirajućoj sjednici nadzornog odbora, iz reda članova nadzornog odbora.

## Član 13.

(1) Imenovanja u regulirane organe vrši se na period od četiri (4) godine, uz mogućnost ponovnog izbora, a najviše dva mandata uzastopno.

(2) Naknada za predsjednika i članove utvrđuje se aktima reguliranih organa ili Osnivača.

## **Član 14.**

(1) Smjer, odnosno zanimanje u okviru stepena školske spreme utvrđuje se aktima reguliranih organa (statutima i pravilima) prema prirodi poslova i registriranoj djelatnosti.

(2) Prilikom utvrđivanja ili primjene kriterija i standarda Komisija iz člana 17. ove Odluke, obavezno će se pridržavati Zakona o zabrani diskriminacije, Zakona o ravnopravnosti spolova.

## **IV – OGLAŠAVANJE UPRAŽNJENIH POZICIJA**

### **Član 15.**

(1) Oglas za upražnjene pozicije u regulirane organe u skladu sa standardima i kriterijima utvrđenih ovom Odlukom objavljuje se u „Službenim novinama Federacije BiH“ i u jednom dnevnom listu, veće tiraže, s ciljem da bude dostupan najširoj javnosti.

Oglas za upražnjene pozicije treba sadržavati:

- opis upražnjene pozicije, uključujući i pojedinosti o ulozi potencijalnog kandidata,
- opće i uslove utvrđene članom 6. i posebne uslove iz članova 7, 9, i 11.. ove Odluke,
- popis potrebnih dokumenata, rok i mjesto za podnošenje prijava (traženi dokumenti koji se prilažu moraju biti u originalu ili ovjerene kopije).

(1) Oglas o upražnjenoj poziciji treba biti dovoljno detaljan da bi kandidatima dao potpunu informaciju o ulozi koju treba vršiti u reguliranom organu, nadoknadi, uvjetima službe i dužini trajanja mandata i mogućnosti ponovnog imenovanja.

(2) U reguliranim organima gdje pored predstavnika Osnivača ima i predstavnik organa čiji je regulirani organ, taj organ može dati saglasnost Komisiji Osnivača da u njegovo ime provede proceduru-postupak do konačnog imenovanja.

(3) Ako reguliran organ ima predstavnike viših nivoa vlasti onda postupak predlaganja provodi organ tog nivoa vlasti.

(5) Oglas u ime osnivača za regulirane organe utvrđene ovom Odlukom raspisuje Općinski načelnik.

### **Član 16.**

(1) Krajnji rok za podnošenje prijava je 15 dana od dana posljednjeg objavljivanja oglasa.

(2) Podnosioci prijava s kojima se ne stupi u kontakt u roku od 8 dana od isteka roka za podnošenje prijava neće biti uzeti u razmatranje u daljnjem procesu imenovanja.

## **V – KOMISIJA ZA IZBOR U REGULIRANE ORGANE**

### **Član 17.**

(1) Provedbu postupka imenovanja na upražnjene pozicije u regulirane organe utvrđene članom 2. ove Odluke, provodi komisija za izbor u regulirane organe (u daljem tekstu: Komisija).

(2) Komisija u skladu sa ovom Odlukom rang listu za konačno imenovanje dostavlja odgovornom javnom službeniku iz člana 3. Ove Odluke.

(3) Komisiju imenuje Općinsko vijeće, na prijedlog Općinskog načelnika iz reda državnih službenika zaposlenih u Općini.

(4) Komisija se sastoji se od 5 članova

(5) Članovi komisije moraju imati visoku stručnu spremu društvenog ili tehničkog smjera, odnosno visoko obrazovanje prvog ili drugog ili trećeg ciklusa Bolonjskog sistema studiranja sa najmanje 180 ECTS bodova i tri godine radnog iskustva po završetku visokostručnog obrazovanja.

(6) Komisija u okviru svojih nadležnosti:

- utvrđuje prijedlog oglasa za upražnjene pozicije u reguliranim organima i dostavlja ga Općinskom načelniku radi objave,
- vrši pregled prijava kandidata i utvrđuje njihovu formalno–pravnu ispravnosti
- sastavlja listu pitanja za intervju
- provodi intervju s prijavljenim kandidatima,
- sastavlja listu sa užim izborom najboljih kandidata koji ispunjavaju kriterije za imenovanje,
- predlaže odgovornom javnom službeniku rang listu putem pisane preporuke na dalje razmatranje,
- vrši i druge poslove koji proizilaze iz zakona i ove Odluke.

(7) Komisija radi na način i po postupku kao i radna tijela Općinskog vijeća Vareš u skladu sa odredbama Poslovnika o radu Općinskog vijeća Vareš. Članovi Komisije imaju pravo na naknadu u skladu sa Odlukom Općinskog vijeća Vareš.

## **Član 18.**

Kod utvrđivanja rang liste kandidata koji ispunjavaju opće i posebne uvjete utvrđene u članu 6, 7 ,9. i 11 ove Odluke, Komisija će utvrditi broj bodova za svakog kandidata po slijedećim dodatnim kriterijima:

1. Stupanj stručne spreme:

- Za stupanj srednje stručne spreme (III, IV i V stupanj), 3 bodova,
- Za stupanj više stručne spreme, 5 bodova,
- Za stupanj visoke stručne spreme, odnosno visoko obrazovanje prvog, drugog ili trećeg ciklusa Bolonjskog sistema studiranja,7 bodova,

2. Dužina radnog iskustva nakon sticanja odgovarajuće stručne spreme:

- od dvije do pet godina radnog iskustva, 3 bodova,
- od šest do deset godina radnog iskustva, 5 bodova,
- od 11 do 20 godina radnog iskustva, 7 bodova,
- od 21 godinu i više radnog iskustva, 9 bodova

3. Po osnovu obavljenog intervjua:

- Kandidati po osnovu intervjua, boduju se od 1 do 5. Ukupan broj bodova koji pojedini kandidat dobije nakon obavljenog intervjua će se izračunati tako da se bodovi koje daju pojedini članovi Komisije zbroje i podijele sa brojem članova Komisije za izbor.

## **VI – RAZMATRANJE PRIJAVA I INTERVJU**

### **Član 19.**

(1) Po objavljenom oglasu za upražnjene pozicije i istekom roka za prijave, Komisija za izbor vrši uvid u sve prijave kandidata podnesene u propisanom roku. Prijave koje nisu uredne, blagovremen i kompletne Komisija neće razmatrati.



(2) Po izvršenom uvidu i pregledu prijava Komisija za izbor, na osnovi standarda i kriterija utvrđenih ovom odlukom i objavljenom oglasu, sastavlja listu s užim izborom najboljih kandidata koji ispunjavaju kriterije za imenovanja.

(3) Svi kandidati koji su ušli u užu izbor se pozivaju na intervju.

(4) Intervju se obavlja na način kojim će se poštivati Načela iz člana 4. ove Odluke.

## **Član 20.**

(1) U toku intervjua, Komisija za izbor će predložiti slijedeće:

- da su svi kandidati u potpunosti upoznati sa standardom osobnog integriteta koji se traže za osobe imenovane na javnu poziciju,
- da su pitanja o sukobu interesa detaljno objašnjena i razmotrena sa svim kandidatima,
- da su svi kandidati u potpunosti informirani o pravu javnosti i transparentnosti cjelokupnog procesa imenovanja, te da mogu uložiti prigovor protiv konačnog imenovanja,

(2) Sve odluke komisije koje proizilaze s intervjua moraju se u potpunosti dokumentovati.

## **VII – KONAČNA IMENOVANJA I OBJAVA**

### **Član 21.**

(1) Nakon provedenog intervjua s prijavljenim kandidatima i na osnovi, u potpunosti dokumentovanih odluka svakog člana Komisije, Komisija utvrđuje rang-listu s najboljim kandidatima i listu dostavlja odgovornom javnom službeniku.

(2) Prijedlog rang-liste mora biti dovoljno obrazložen.

(3) Smatra se da je kandidat koji je prvi na rang-listi i kojeg je predložila većina od ukupnog broja članova komisije, najuspješnije prošao otvorenu konkurenciju.

(4) Pri imenovanju predsjednika i članova Upravnog odbora Javne ustanove „Centar za socijalni rad“ Vareš, Javne predškolske ustanove „Dječije obdanište“ Vareš, Javne ustanove Opća biblioteka Vareš i Javne ustanove Centar za kulturu i edukaciju Vareš, Općinski načelnik nakon razmatranja prijedloga rang-liste kandidata će donijeti odluku o konačnom imenovanju.

(5) Pri imenovanju predsjednika i članova Upravnog odbora Javne ustanove Dom zdravlja Vareš i imenovanju predsjednika i članova skupštine javnog preduzeća, Općinski načelnik nakon razmatranja prijedloga rang-liste kandidata predlaže Općinskom vijeću kandidate, a Općinsko vijeće će donijeti odluku o konačnom imenovanju.

(6) Kod donošenja Odluke o konačnom imenovanju, odgovorni javni službenik iz člana 2. ove Odluke pored načela iz člana 4. ove Odluke, vodit će brigu o zabrani diskriminacije po bilo kojem osnovu.

### **Član 22.**

Sva konačna imenovanja se objavljuju u „Službenim novinama F BiH“ i oglasnoj tabli Općine Vareš.

## **VIII – PRIGOVORI NA KONAČNA IMENOVANJA**

### **Član 23.**

(1) U slučaju kada postoje dokazi da principi utvrđeni ovom odlukom i zakonom, ili postupci nisu ispoštovani, zainteresirana stranka može podnijeti prigovor na konačno imenovanje.

(2) Prigovor se podnosi odgovornom javnom službeniku, a kopija dostavlja i Ombudsmenu za ljudska prava BiH.

(3) Ombudsmen može poduzeti sve mjere neophodne da se prigovor ispita.

(4) Odgovorni javni službenik je obavezan Uredu ombudsmena dostaviti pisani odgovor na prigovor u roku od 14 dana od dana kada je prigovor podnesen.

## **IX – PRIJELAZNE I ZAVRŠNE ODREDBE**

### **Član 24.**

Sva javna preduzeća, javne ustanove i drugi regulirani organi u kojima Općina Vareš vrši ovlaštenja i obaveze vlasnika državnog kapitala, odnosno u kojima ima pravni interes kao osnivač, dužni su u roku od 30 dana od dana stupanja na snagu ove odluke uskladiti svoje akte s odredbama ove odluke.

### **Član 25.**

Sve imenice upotrijebljene u ovoj Odluci samo u muškom ili ženskom rodu, odnose se na oba spola.

### **Član 26.**

Na sva ostala pitanja koja nisu uređena ovom Odlukom, primjenjuje se Zakon, akti Općine Vareš i akti javnih preduzeća i javnih ustanova.

### **Član 27.**

Stupanjem na snagu ove odluke prestaje važiti Odluka o utvrđivanju standarda i kriterija za konačna imenovanja na pozicije u regulirane organe (prečišćeni tekst), broj:01-50/13 od 18.02.2013. godine i Odluka o izmjenama i dopunama Odluke o utvrđivanju standarda i kriterija za konačna imenovanja na pozicije u regulirane organe, broj: 01-178/13 od 20.06.2013.godine.

### **Član 28.**

Ova Odluka stupa na snagu osmog dana od dana objavljivanja na oglasnoj tabli Općine Vareš.

**Broj: 01-149/20**

**Vareš, 29.10. 2020.godine**

**ZAMJENIK  
PREDSJEDAVJUĆEG  
OPĆINSKOG VIJEĆA**

**Nikola Šimić**

Ova Odluka objavljena je na oglasnoj tabli Općine Vareš, dana 30.10. 2020.godine.

**OPĆINSKI NAČELNIK**

**Zdravko Marošević**